



Jumat, 29 Maret 2024

Ogen: Johanes 19:28-30



Jesus Mate



Ibas sada pertandingan maka si jadi peserta erlumba kerina gelah menang. Ketalun e sada kebiaren ras si man kemelanken. Bageme pe bas kegeluhen kerina kalak erlumba gelah menang, kematen iakap sada ketalun si erbanca mela. Kejadin Tuhan Jesus i kayu silang sada ketalun ras si erbahanca mela ajar-ajar ngakuken IA selaku guru. Tapi kematen Tuhan Jesus e me sada kejadin si enggo inubuatken bas Pustaka Si Badia. Arus jadi guna kemenangen Dibata nandangi kuasa dosa.

Sada wari sada berngi nenganami kiniseran, 3 jam ipakuken, darehNa mambur dinggen kulana kerah, muas IA sisada bas kayu silang e, Jesus tetap nuduhkan kebayaken pusuhNa si dem alu keleng ate. Perkuah ateNA la keru man banta kerina manusia perdosa. Sanga kerina dosa manusia ras dosa doni enda iampeken ku IA, epe ngasup dengan IA ngalemi salah kalak man baNa. Mate Jesus e, tapi bas kematenNa menang IA nandangi kedagingen manusia, janah sehkenNa misiNa guna jadi gancih manusia si perdosa, jadi korban pengalemi dosa. IA mate labo ban ukum tapi mate erkiteken ndalanken peraten Dibata.

Penderitan si inanami Jesus adi si ukuri tuhu-tuhu mesangat. Kita saja pe dekah nggeluh enda ntah japha na pe labo arah kiniseranNa e. Terlebih kiniseran si inanamiNa e labo man guna diriNa, tapi gelah kita selamat. Si jadi responta bas sie? Ingetlah, Tuhan Jesus pe ndalani Via Dolorosa, maka mari si persan silangta, majulah guna kiniteken gia sialoken kiniseran, Tuhan Jesus kap usihenta. Mate guna turah reh belinna, reh paguhna bagepe reh mburnisna buahna.

 *Bagi benih page, mate lebe jenari ersuli, turah me*